

Date – 19/12/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Reserve Bank of India (RBI) chuan tun hnai khan finance officer-te tan 'Government Banking and Accounting' an buatsaih a, Mizoram atangin Finance Department Deputy Secretary Pu Rosiamliana a tel.
2. Sports & Youth Services Minister Pu Lalnghinglova Hmar hoin nimin tlai khan Mizoram Cricket Team chuan Syed Mushtaq Ali Trophy champion an nih an lawm.
3. Parliament chuan Viksit Bharat – Guarantee for Rozgar and Ajeevika Mission (Gramin): Bill 2025 chu nimin khan a pass.
4. Prime Minister Narendra Modia chu Oman chawimawina sang Order of Oman award hlan a ni.

<><><>

RBI ORGANISES WORKSHOP

Reserve Bank of India (RBI) chuan tun hnai khan finance officer-te tan 'Government Banking and Accounting' an buatsaih a, Mizoram atangin Finance Department Deputy Secretary Pu Rosiamliana a tel.

Tangka sum vawn leh enkawl dan chungchanga inzirtirna hun hi hlawm hnih a then hran a ni a, hlawm khatna hi Mumbai-ah buatsaih niin, a hlawm hnihna erawh RBI hnuaia Central Accounts Section (CAS), Nagpur-ah neih a ni thung.

Workshop neih chhung hian RBI hotute chuan tun hnaia Mizoram in overdraft a luh loh thu an tarlang a, State tenau zinga sum hman dan dik tak lantir thei zingah a tel tih an tarlang bawk. State IFMIS kaltlangin e-Payment lama State-in hmasawinna nasa tak a neih chu an pawm bawk a, e-Receipts lama hmalaknate tihchak belh a tul thu an sawi bawk. Mizoram palai chuan SNA SPARSH kalpui dan tur RBI account hawn thuai a tul thu an hrih a. RBI hotute chuan system leh kalphung thar hman a nih avanga hnathawhna lama harsatna awmte sutkian kawngah State Sorkarte thawh hona leh thlawpna rang taka pek an tum thu an tiam bawk.

He hunah hian Reserve Bank of India thuneitu tawnhirat nei tha tak tak Chief General Manager Sivakumar Bose, General Manager hrang hrang leh mi pawimawh dang ten zirtirna an pe a ni.

<><><>

MPF

Mizoram People Forum chuan kum 2026-2027 chhunga an budget atan cheng nuai 14 sing khat sang riat an pawm.

MPF hian nimin khan Vanapa Hall-ah Annual General Meeting vawi 18-na an nei a. Meeting hi hun hniha then niin chawhma hun hi Vice President Pu

Nghaklianmawia in kaihruaiin General Secretary Rev. Lalramliana Pachuau hnen atangin MPF hmalakna tlangpui report ngaihthlak a ni.

Chawhnu hun hi President Rev. RC Lalnghakliana'n a kaihruai a, MPF President thar Rev John Raldosanga hnenah President nihna a hlan nghal bawk.

Annual General Meeting-ah hian Vice President leh Rev. K. Lalrinmawia te hnen atangin 'MPF hmasawnna tur' leh 'Sawrkhar tha nei tura mawhphurhna' tih thupui hmangin thusawi ngaihthlak a ni bawk.

MPF khawmpui-ah hian Governing Board, District Forum, Constituency Forum, Local Forum leh NGO atanga palai ruatte an tel a ni.

<><><>

SPORTS MINISTER

Sports & Youth Services Minister Pu Lalnghinglova Hmar hoin nimin tlai khan Mizoram Cricket Team chuan Syed Mushtaq Ali Trophy champion an nih an lawm.

Hotel Floria Rooftop-a hun hmanah Minister chuan, Mizoram Cricket Team te hlawhtlinna chu lawmawm a tih thu a sawi a. Player-te chu an thlen chin a duhtawk mai lovin, sang tak thlen tum turin a chah a. Amah ngei pawhin tun hmaa Cricket a khelh thin lai te sawiin, tun hnua Mizorama Cricket-in hma a sawn zia te a sawi a, player-te chu tih tak takna nena khel tura fuihin, cricket-ah eizawnna tlak a awm thu a sawi. Inkhelmite chu an chhungkua, khawtlang leh kohhran leh Mizoram te theihnghilh mai lova, malsawmna pe lettu ni fo turin a chah bawk.

Champion lawmna hun hi Cricket Association of Mizoram (CAM) buatsaih niin, Syed Mushtaq Ali Trophy hi India ram T20 cricket inelna, Board of Control for Cricket in India (BCCI) buatsaih a ni a, kum 2025-26 season inelnaah hian team 38 telin, Elite Group (32 teams) leh Plate Groups (6 teams) ah te then an ni. Plate Group bikah hian cricket lama region hnufual deuh a mi Team Paruk (6) te an tel a, vawi khat theuh intum kualin a sang ber pahnih, Sikkim leh Mizoram te’n Final an lut a. Pune a Final an khelh-ah Mizoram in Sikkim chu run 10 a hnehin, an champion ta a ni. Plate Champion te hian season lehah Elite section an khel thei dawn a, Elite Group a rank hniam ber aiin an khel dawn a ni.

He hunah hian Mizoram Men’s Under-23 te lawmpuina hun hman a ni bawk. Mizoram Men’s Under-23 Cricket Team te pawh hi Under-23 Category ah pahnihna an ni.

<><><>

SWACHHATA HI SEVA

Nimin khan Champhai District Urban Development Officer Pisa-ah, Faina beihpuithlak (Swachhata Hi Seva, 2025 Champion) a mimal faina kawnga hna thawk tha te Champhai Town Sanitation Task Force Committee chuan chawimawina hun an hmang.

He hunah hian DUDO Pu Ngulzathuama chuan, faina chu mitin mawhphurhna a ni tih a sawi a, mipui hriselna leh khawtlang hmasawnna nghet tak neihna atana thil pawimawh tak a nih thu a sawi a, Champhai District pawhin faina kawngah Sawrkhar leh district mipuite thawh hona avangin nasa takin hma a sawn hle a tih a sawi. Faina chu campaign leh intihsiaknaah chauh innghat lovin, nitin nunah thil pawimawh tak a ni a, a theihna kawng hma la chhunzawm zel turin district

mipui a sawm a, Swachhata Hi Seva, Champion chawimawina dawngtute hnenah lawmthu sawiin faina hnathawh chu chhunzawm a, mipui leh khawtlang tana rawngbawlina a ni tih hriaa midangte zirtirtu nih tum theuh turin a fuih bawk a ni.

<><><>

NCORD MEETING

Kolasib DC Conference Hall-ah District Level Narco Coordination Centre (NCORD) Committee chu nimin khan an Chairman, Kolasib DC Pu Robert C. Lalmangaiha hovin an thukhawm.

Chairman Pu Robert C. Lalmangaiha chuan, DC chuan Krismas leh Kumthar lo thleng turah mipuiten him leh muang taka hunpui an hman chu a duhthusam a nih thu sawiin, ruihhlo leh buaina tel lova boruak muanawm hnuaia hunpui hman a nih theih nan member kalkhawmte chu anmahni zawn theuh ah tan la turin a chah bawk a ni.

Kolasib Police report tarlan a nih danin kumin November ni 17 atanga December ni 18 chung khan ruihhlo (Heroin) gram 83.55 manin, ND&PS Act hnuaiah thubuai pakhat an zia lut a. Sap Zu (IMFL) bottle 1320 (750ml) man in, MLP Act hnuaiah thubuai 1 ziah luh a ni bawk.

Excise and Narcotics Department pawhin report pe in, kumin November ni 7 atanga December ni 15 chung khan Zu chi hrang hrang (Rakzu, IMFL, Yeast leh Beer) an man belhkhawm hlutna (value) chu cheng nuai 17 chuang a tling tih an tarlang bawk.

NCORD (Narco Coordination Centre) hi Ministry of Home Affairs (MHA) ruahmanna hnuaia ruihhlo do tura din a ni a. State, District leh Block level-ah te Committee din niin, ruihhlo tawlh ruk leh hmansualna(drug trafficking and abuse) do turin sorkar Department hrang hrang te leh pawl hrang hrang aiawhte inrawnkhawmin hma an la thin a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

KRISMAS PRESENT

Mizoram Co-operative Apex Bank Ltd. Serchhip Branch leh Serchhip Sub Hqrs YMA ten Krismas thilpek an sem chhuak.

Nimin khan New Serchhip Kikawn a ruihhlo ngaite enkawlina hmun 'Family of Christ'leh Serchhip a rualbanlo School 'Shalom Spastic Society /School' te hnenah Krismass thilpek hi an hlan a, heng bakah hian mimal harsa zawk te hnenah pawh Krismass thilpek pe in, Mizote Bank neih chhun an nih ang a dawr chhunzawm zel turin Apex Bank te chuan mipuite an sawm nawn leh bawk a ni.

Hetihlahian, Sub-Hqrs. YMA Serchhip chuan nimin khan kumin atana an Office kharna hun hmangin Serchhip District chhunga Damdawi In leh Home hrang

hrang 17-ah Krismas thilpek an sem baw a, Serchhip Sub-Hqrs. YMA Serchhip hian kumin hian Serchhip District-a Damdawi In (District Hospital, CHC leh PHC) hrang hrang bakah District Jail, Fahrah enkawl na hmun, ruihhlo ngaite enkawl na leh Shalom Special School-ah te Krismas thilpek hi pe ve bawkin, Krismas thilpek an sem chhuah hi a vaiin Rs. 34,000/-a (sing thum sang li) a ni.

<><><>

AIZAWL SP PRESS CONFERENCE

Aizawl SP Pu Zosangliana'n kumin chhunga Aizawl DEF hnuatia Police Station hrang hrangah nimin December ni 17 theng khan thubuai 1764 ziahluh ani tawh a ti.

Vawina a pisa-a chanchinbumite nena Aizawl District Police-te hnathawh dan leh, dan leh thupek ken kawh chungchanga mipuite hriattur an sawihona hunah he thu hi a sawi a, Pu Zosangliana chuan heng thubuai ziah lu 1764 zinga 1150 chu chhuichhuah tawh a ti a, thubuai 1009 chu a chhui hna zawhfel a nih piah lamah report hnunung chargesheet theluh a nih tawh tih sawiin thubuai 421 chu chhui mek a nih thu leh thubuai lut zinga 333 chu chhuichhuah loh a nih thu a sawi baw.

Pu Zosangliana chuan kumin 2025 kum kal mekah Aizawl District chhunga thubuai lian tham zingah tualthah thubuai 11 ziahluh zinga 10 chu chhuichhuah a ni tawh a ti a, ruihhlo avangin dan bawhchhia mi 36 an man bakah thubuai 32 ziah lu a nih thu sawiin ruihhlo an man zat hlutna chu cheng vaibelchhe 43 nuai 296 ani tih sawiin kumin chhungah Aizawl district-a mahni nunna la mi 30 leh tui tla 12 bakah damdawi overdose avanga boral 36 an awm thu sawiin accident avang leh chhan hriat lova thi 78 an awm thu a sawi baw.

Aizawl SP chuan Krismas leh Kumthar mipuiten ralmuang taka an hman theih nan dan leh thupek kenkawh kawngah nasa taka hma an lak thu a sawi a, Aizawl khawpui chhungah Police duty na pawh gazetted officer uapna hnuatia zone 4 a an then thu leh heihi karleh thawhlelni December ni 23 atanga kumthar 2026 January ni 2 thleng a tlaivar a kenkawh tur a nih bakah zan tin khawlaiah Police an kal kual dawn a ti baw.

<><><>

G R A M G B I L L

Parliament chuan Viksit Bharat – Guarantee for Rozgar and Ajeevika Mission (Gramin): Viksit Bharat – G R A M G Bill 2025 chu nizan khan a pass. Lok Sabha-ah nimin khan pass anih hnuin nizan khan Rajya Sabha-ah sawihoa pawmpui a ni a. He bill hian kum 20 chuang lo hman tawh Mahatma Gandhi National Rural Employment Guarantee Act, 2005 a rawn thlak dawn a. Dan thar ah hian ni 100 inhlawhna neih thin chu ni 125 ah tihpun a ni a. Zawhna chhangin Union Rural Development Minister Shivraj Singh Chouhan chuan Prime Minister Narendra Modia kaihhruaina hnuatia MGNERGA scheme chu tluang taka kalpui a ni a ti a. UPA sawrkarah cheng vaibelchhe nuai 2 sing 1 leh sang 3 sen anih laiin Modia sawrkarah chuan cheng vaibelchhe nuai 8 sing 5 leh sang 3 hman a ni a ti .

<><><>

P M

Prime Minister Narendra Modia chu Oman chawimawina sang Order of Oman award hlan a ni. PM Modia hian India leh Oman inlaichinnaa a thawhhlawk avangin he chawimawina hi hlan a ni. Nimin vek khan India leh Oman te chuan thawhdunna thar Comprehensive Economic Partnership Agreement (CEPA) an zia. Prime

Minister Narendra Modia leh Oman hruaitu Sultan Haitham bin Tariq AL Said te hriatpuiin Muscat khawpuiah he inremna hi ziah a ni.

Nimin khan Oman hruaitu Sultan Haitham bin Tariq AL Said nen hian an inkawm a. Ram pahnih inkara thawhdunna hrang hrang leh khawvel thil thleng pawimawhte an sawidun a. Oman-a sumdawng lian ho te nen an inkawm bawk a ni.

Tun tuma Prime Minister Modia zin hian ram pathum Jordan, Ethiopia leh Oman te a tlawh a. Ram hruaitu leh sumdawng hotute kawmin India nena thawhdunna hrang hrang a sawipui a. Inremna engemawzat ziah a ni bawk.Nizan khan Prime Minister Modia hian Delhi panin a rawn haw leh a ni.

<><><>